

100 роки од народзенья о. Михайла Макая

О. Михайло Макай ше народзел 28. октобра 1922. року у Руским Керестуре. За священіка го 18. юлия 1948. року пошвецел дяковецки римокатолицьки владика Антун Акшамович. Два роки бул на постдипломских студийох у Риме, у Институту за духовносц.

Перше душпастирске место му було у Мрзлим Полю у Жумберку, одкадз 1954. року преходзи за секретара владики Гавриїла Букатка до Крижевцох. О два роки преходзи до Загребу дзе до 1966. року бул духовнік, префект и економ Грекокатолицькей семинариї, а и далей окончовал длужносц владикового секретара.

Року 1966. меновани є за пароха у Руским Керестуре и теди тота парохия постала и видавательни центр. Так 1969. видани перши Християнски календар и од теди о. Макай видава календари каждого року. Попри того, видал кнїжочку „Моя вира”, осем катехетски приручнїки за школярох основней школи. Литургию св. Йоана Златоустого и преклади шицких штирох євангелийох, молитвенїк „Оче наш”, Венчик дзевятнїцох, Коляди, Марийово писнї, кнїжочку „Закон Божи” и други.

Окончени и вельки роботи на обнавяню церковного будинку и турнї, у порти збудована сала за виронауку, направена нова капелания и будинок за библиотеку у рамикох парохії, направени нови манастир, обновена церква у Водици и направени простор за богослуженя опрез ней.

Парох Макай организовал паломнїцтва до Лурду, Риму, Святей Жеми и индзей, робел з младима и организовал з нїма програми, стретнуца, а обновени и церковни хор св. Миколая, хтори на даскельо заводи госцовал и у иножемстве.

Року 1998. поцагнул ше до пензиї, а 6. януара 2000. року умар у новосадским шпиталю. Поховани є у Руским Керестуре.

М.С./о.Р.М.,М.Р.